

A Pordenonelegge la storie avventurose de lenghe furlane

Vinars ai 18 di Setembar William Cisilino e Flavio Santi a presentin “Une Fevele Sflandorose/Una Splendida Favella”, il gnûf volum ARLeF su la lenghe e la leterature furlane

La storie de lenghe furlane e de sô leterature e rive a **Pordenonelegge**. **Vinars ai 18 di Setembar dal 2026, aes 15.00**, inte **Sale ProPordenone** (Viâl Cossetti 20), al sarà presentât “**Une Fevele Sflandorose. Storie avventurose de lenghe furlane e de sô leterature/Una Splendida Favella. L’avventurosa storia della lingua friulana e della sua letteratura**”, il gnûf volum firmât di **William Cisilino e Flavio Santi** e publicât de ARLeF – Agenzie regionâl pe lenghe furlane par scuvierzi la ricjece de *marilenghe*.

Un viaç a travers dai secui che al torne a dâ dongje une storie avventurose - come che al evidenzie il sottitâl - e al acompagne il letôr dilunc di doi percors complementârs: la storie linguistiche dal furlan e de sô difusion, e la storie de sô leterature, des primis testimoniancis fin ai autôrs contemporanis.

La presentazion dal volum si vierzarà cul intervent dal **President de ARLeF, Eros Cisilino**. Cui autôrs, e dialogarà la **gjornaliste Marta Rizzi**.

Come che al conte il scritôr Giorgio Fontana, che al firme la prefazion dal volum: “*A son lis dôs animis, chê popolâr e chê leterarie, che a vegnin esploradis tal ordin cui contribûts di Cisilino e di Santi – ancjemò plui prezios parcè che a slargjin a sorprese l’orizzont dal furlan. Cisilino, par esempi, nus pant che l’autôr dal prin test par protofurlan al è stât un african, e o presein il sincretisim che al à dât forme e vivôr ae marilenghe tai secui – inalterade tant che lenghe regionâl, une raritât intun Nord Italie di comuns. Santi, invece, nus regale un sfolmenât cors intensif di leterature furlane, de Ete di Mieç a Pierluigi Cappello, fondât su la cubie “lusôr-viamence” che si intone tant ben cun cheste lenghe scrite.*”

Tal volum a cjatin spazi ancje i dâts sociolinguistics plui resints, presentâts midiant di infografichis preziosis e semplicis e un “Struc dal struc” dedicât ae storie dal Friûl e aes ativitâts di tutele e promoziun de lenghe metudis adun tai ultins agns di svariâts sogjets impegnâts in chest setôr.

Dal dut bilengâl, par furlan e par talian, “Une Fevele Sflandorose/Una Splendida Favella” al met dongje une impostazion divulgative e il rigôr sientific e al è insiorât di un aparât iconografic plen di documents, mapis e testimoniancis visivis. Un libri pensât par cui che

INFORMAZIONI PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<

al cognòs za e al à a cûr il furlan, ma ancje par cui che al vûl svicinâsi pe prime volte ae storie di une lenghe che e je intal stes timp memorie, identitât e realtât vive, buine di fevelâ al presint e al futûr.

Par informazions, scrivi a: arlef@regione.fvg.it

I autôrs

William Cisilino. Al è diretôr de ARLeF. Al è stât vicepresidente dal NPLD, la rêta europeane des lenghis minoritariis. Al è autôr di variis publicazions su la tutele juridiche des minorancis linguistichis in Italie e in Europe. Su la lenghe e la culture furlane al à publicât: *Friulano lingua viva* (par cure di, 2008), *Sorestants e sotans* (cun Gianfranco D'Aronco, 2012); in lenghe furlane: *O sin dal gjat* (2018), *Mi capis ben me* (2019), *Dizionari bastian contrari de lenghe furlane* (2020), *Ognun al bale cun sô agne* (2025). Tal 2025 al à vinçût il Premi internazionâl "Ramon Llull".

Flavio Santi. Al insegne inte Universitât de Insubrie di Como-Varese. Al volte autôrs classics e contemporanis. Al à scrit di vampîrs, precaris, supererois, ma soledut dal Friûl, sedi in poesie che in prose. I siei romançs, contis e poesiis a son stâts voltâts in tantis lenghis. Tra i siei romançs: *Aspetta primavera*, *Lucky* (Socrates 2011, candidât al Premi Strega); *La primavera tarda ad arrivare* (Mondadori 2016), *L'estate non perdona* (Mondadori 2017), *L'autunno del sultano* (Solferino 2024). Cun *Quanti* al à vinçût il Premi Viareggio Poesia tal 2021. Al colabore cun cuotidians, rivistis e sîts online.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<